

# Beim Dräsche

Mir hebbe unsern Habber un unser Korn beim Borchmeeschters-Vedder gedrosche un die Dote ihr Frucht beis Fronis. De Vedder un es Fronis hebbe die gleiche Dreschmaschine vom „Ködel und Böhm“ ghat. Die Drescherei war e Sau-Ärbet. Obbe uff de Maschin is bei uns de Vedder in erre tiefe Kaude dinngschtanne, mit em Bauch is er gäche des kleene Dächle von de Dreschmaschine nogläche un unner dem Dächle do hot er es Korn mit de Henn schöü gleichmesich in die Maschin neigloßt. Wenn er aus Versähe emoll e bisle zu viel verwüsch hot, dann hot er die Maschin abgmorkst.

Unne an de Maschin, wu es gedroschene Schtrou rauskumme is, do sen die Dote un die Mamme gschtanne. Des war es dräggeschte Gschäft, weil do net blous en Mords-Schtaab rauskumme is, do sen a die Achel blous sou

dorch die Luft gfloche, un die hebbe beim Korn un erscht recht bei de Gerschte ganz schöü gschtöche un gjuckt. Die Weibsläüt hebbe als net blous Döchli üm de Kopf, sondern a üms Maul gebunne, äbber des hot halt blous es Gröübschte abghalte. Zum Dräg is dann no der Mordslärm dezukumme, wu die Dreschmaschine gmacht hot.

Eener von uns Bube hot die Garbe vom Häüwaache uff die Dreschmaschine vor de Vedder noschmeiße gmößt. En anderer war uff de Maschin vor em Vedder ghockt. Dort hot der die Garbe erscht emoll richtig rümmdröhe un dann mit eme Messer uffschneide gmößt. Manchmols do hebbe mir Kinn a unne bei de Weibsläüt es gedroschene Schtrou zsammebinde un hinnenausschläfe gedärft. Des war net es Schlechteschte, do bischt wenichschtens zwüschenei als emoll naus an die frisch Luft kumme.

In de Zeit von de Ärn wars mehrschdens recht häß un zum Dräg is an no es Schwitze dezukumme. Wenns Dresche vorbei war, do hebbe mir als ausgsähe, wie die Schlodfecher un von obbe bis unne hot alles gjuckt. Bäder un Dusche hots domols no kenni gäbbe. Mir Kinn sen do eefach nabb die Bech un ins Wasser gschprunge. Wie die Weibsläüt sich sauber gmacht hebbe, des wäß ich häüt no net sou richtich. Die Mamme hot im Schlofzimmer zwar e Waschlavor ghat, äbber do hot mer jo schließlich net neisitze gekönnt.



Büchlein auf mir singe eens von Josef Knapp